

Bubu Pancho e negociante chikito

Pa: Roland W. Peterson

AWE ta di siete biaha cu Bubu Pancho mester bai banco pa e haña su prestamo chikito di fls.2000, pa drecha su negoshi.

Bubu Pancho ta un negociante cu pa hopi aña tin un tienda chikito unda bo por haña tur cos cu bo no tin mester.

Na banco e mester a cana e caminda di Calvario seis biaha caba. Ya caba e mester a conta nan cu su abuelo tabata bende pisca pa nort eibanda y cu su abuela tabata bende pinda bau di e palu Watapana.

Na banco ya caba e mester a duna tur su pertenencianan como borg. Su cas, su cama, su ijskast, su stoof, Rex su cacho y tambe 50% di su jockeynan (cu ta dos). Su auto y tambe e emchi cu e pida gamuz cu e ta laba e auto cune.

Awe e ta na banco cu Frederico.

Ai ... sorry mi ta compronde cu boso no sa ken ta Frederico.

Wel Frederico ta un "goudvis" cu e tin pa basta aña caba. Frederico ta su ultimo pertenencia y banco kier e tambe.

Wel wel ata Bubu Pancho cu Frederico den su comchi na banco.

Bon dia juffrouw, mi tin un cita cu señor Director pa aki cinco minuut.

"Para den rij señor Pancho y warda bo turno."

Pero juffrouw e rij ta hopi largo.

"No worry señor Pancho, tene un tiki pash-enchi."

Despues di cincuenta seis (56) minuut e juffrouw ta bin cerca Bubu Pancho.

"Meneer Pancho bo ta para den rij robes. Ta e rij eibanda bo mester para aden."

Pero juffrouw mi ta cincuenta seis (56) minuut laat pa e cita cu e señor Director.

"No worry señor Pancho. Awor bo ta number seis den rij. E Director mes no a yega ainda."

Ata ... papiando di diabel, wak ken a yega.

Juffrouw, juffrouw cancela tur mi afspraaknan pa un otro dia, mi tin di bai un "lunch meeting" meshora.

Awor Bubu Pancho ta na caminda pa cas cu Frederico.

Seis dia despues Bubu Pancho cu Frederico ta na banco atrobe.

E biaha aki si e la trece un snechi pan pa Frederico come.

E tin un cita pa 11 or. Awor si e ta un hora mas tempran.

"Juffrouw e sei no ta señor Director na e porta di entrada?"

"Si señor Pancho e tin dos hora caba ta warda un señor cu kier un prestamo.

E Director a puntrami seis biaha caba si e cofi ta kla".

Porfin e señor a caba di yega.

E Director ta dune un man y un abrazo. Bon bini, bon bini, ban den mi oficina.

Bubu Pancho ta scucha cu nan ta papia Spaño y e ta reconoce e señor.

E ta Don Yuan Pedro Francisco Minguel de la Pampoena. E ta capitan di un barco cu sa bin Aruba.

Awor Bubu Pancho cu Frederica ta sinta paford e oficina. Nan ta tende tur cos cu ta wordo papia.

"Ta treinta mil dolar so señor de la Pampoena kier? Mi tin sesenta mil pa señor, y si bo mester mas, bo por haña tambe"

Pa cuminsa treinta mil ta ta bon. Pero tambe bo mester compronde, mi no tin intencion pa paga e bek tampoco.

"No "importa" mi tin e placa pa abo y hora bo por nos ta bai mira. Bai cu e placa y bin bek mañan pa firma e contract".

Pober Bubu Pancho y Frederico no por kere nan oreanan.

Di rabia Frederico a cambia di color. Awor e la bira un "Roodvis". E ta dal dos buelto cu speed den su comchi y ... splash e ta dilanti di e porta di oficina. E ta dal e porta habri cu su rabu y ta drecha.

"Ami ta Frederico del Agua Arubiano y mi kier e mesun trato pa mi hefe Pancho".

Tur hende a keda masha babuca, pero nan a compronde si kiko Frederico kier meen.